

BAN BIAHA....MI SALUD....CARTA DI AMOR... FANS DI TALENT Y MAS.....

Despues di hopi tempo y cu peticion diariamente pa comentario, awe mi kier mishi cu algun topico.

CUANTO HENDE TA SIGUI BIAHA ?

E pregunta cu mi tin ultimo dianan ta: "Cuanto hende lo sigui biaha na Aruba"? Esaki pa motibo cu si antes un persona tabata biaha pa Corsow, Bonaire, Venezuela, Colombia, y Miami, tres pa cuater biaha pa aña, awor a bira cu ta un, kizas dos biaha nan lo biaha. Esey ta e comentario cu ta wordo menciona tur caminda e dianan aki. Esaki kiermeen cu e companianan di aviacion lo bay sufri, pasobra Arubianonan ta wordo aisla di exterior cu tur e "Tax of this, tax of that, tax, tax y 'daks'" cu ta tira riba nan.

SACA SANGER;DRENTA HOSPITAL; MIRA SPECIALISTA

Ayera atrobe mi ta tende di e dolor cu patientnan ta pasa na Aruba pa por haya tratamento adecuado y cu ta exterior nan mester bay pa nan salud, pasobra "na Aruba no ta existi Salubridad Publico" pa hopi aña caba.

Bo ta bay saca sanger y mester warda dianan prome cu resultado yega. Bo no por dreña hospital pasobra e ta yen, y no tin lugar pa bo. Bo no por haya specialista pasobra e ta asina yen cu bo mester bolbe "net prome cu bo muri" dentro di algun siman. Ni ambulance pa hibabo hospital urgentemente no tin tampoco y si hiba bo cu auto particular, bo no ta registra di a yega cu "ambulance".

Tur ora mi tende ministro y vocero di Salubridad Publico papia di e bon cu nos hospital, y servicionan di Salubridad Publico ta, mi ta haya gana di saca, pa e mentiranen aki, pasobra e pueblo sa mihor.

NOS NUMBER MINIATURA DI AUTO.

E aña aki e keho ta riba nos number di auto cu a krimp. No bin bisami cu ta na Aruba a traha e numbernan aki, pasobra esaki no ta asina. Nan ta numbernan traha den exterior, pero cu aparentemente lo ta ser paga segun presupuesto entrega na gobierno y loke tin acerca. Si ta na Aruba esaki a wordo traha, pa mes compania cu a traha e numbernan aki ultimo añanan, mi no ta kere cu e compania su midinan ta "krimp" sin cu nan sa. Ladronnan y atracadornan awor ta haya hopi oportunidad pa kita number di auto y pega riba auto pa nan fechorianan, pasobra hopi number ta pega "cu scupi" pasobra no por usa schroef.

DECIBELNAN TA BAY CONTRA BIENTO AWOR

Pa varios aña nos tin e problema cu no por usa Entertainment Center, pasobra algun habitante den Klip a keha di e boroto, y cu a resulta cu e decibelnan ta mucho halto.

Mi ta mira un problema similar na caminda, y esaki ta den Sero Colorado unda habitantenan ta grita, zundra, sapatea tur fin di siman, di e "decibelnan" cu ta dreña nan cas. Lo no dura mucho cu lo tende cu habitantenan di Sero Colorado ta bay huez. E cos aki ta holer varios siman caba.

E "CARTA DI AMOR" DI INCASSOBURO Y OTRONAN

Ultimo tempo, e "Cartanan di amor" Bo debe Juby 100 mil dollar y si bo no paga den 15 dia di e fecha aki, lo tuma medida segun ley" etc. etc. ta skeiro.

Pero kico bo ta haya ? E carta ta fecha dia 2 di luna, entrega na post dia 9, y yega na bo cas dia 14 di luna, si bo tin suerte, sino e ta yega despues.

E compania cu a manda e carta semper por referi riba e fecha dia 2, y nan no ta tene cuenta cu e dia cu bo a ricibi esaki, y kizas esey mes ta e mala fe di pone cierto fecha y mande pa despues actua contra bo. Tin cartanan cu ta ser fecha mescos, y cu ta indica cu mester aparece na notario of otro caminda pa cierto asunto (masha importante pabo). Kico ta pasa ? Nan ta mande di un manera cu bo ta sali perhudica, y ta keda para riba e fecha riba e carta, y bo ta perde ni si bo bula riba cay abao.

E "WILDE HONDEN" PA BO BUSCA PA POLIS

E registracion di carta aki ta ponemi corda otro registracion. Siman pasa diasabra mi a haya sa di e caso aki, pero no a mira nada den noticianan di polis, pasobra mi ta sigur cu e NO TA REGISTRA.

Un hoben cu a caba di sali di trabao 3 or di madrugada na hotel, a pasa den hanchi smal, caminda di mondi, banda di San Barbola. Na Dado

momento 3 cacho a sali y ataca e hoben di 21 aña di edad. El a cuminsa core, pero a dal abao debi na e cantidad di buracan y e cachonan a bula riba dje y cuminsa morde. Cu su mannan el a scapa su cara, pero a keda tur mordi na mannan, lomba y pecho y tur na sanger.

El a logra lanta, sigui core y un trailer cu tabata canto di caminda, el a logra subi.

Despues cu e cachonan a bay, el a cana bay na e restaurant "Porton", den vecindario pa yama telefon, pero ningun hende a haci caso di dje. El a sali y yega na cas di su mama di crianza cu a sali cune bay hospital y aki nan a atende cu hangua, y trata e heridanen, pero cu mensahe cu si sangramento no stop e bolbe.

Nan a bay polis y a haya mensahe cu "boso mester bay busca e doño di cacho y duna keho na recherche despues 8 or mainta diasabra". Nan a sali pero naturalmente no ta mira e cachonan y mas o menos 5 or di madrugada cu ainda e restaurant tabata habri cu hende paden y pafo (unda nos ministro a keda?).

Mainta a sali cu e hoben pa hospital atrobe pasobra e heridanen a sigui sangra. (nan a wordo trata masha humano y bon cu hopi cariño na poli) Mainta 8 or a bolbe pa recherche y ta tende: "Bay busca e cachonan y despues bin busca nos. Nos no tin autorizacion pa dreña cura di hende".

E hoben a pasa den keintura y dia ey.. Bay docter di cas cu ta bise: "bin back tres or". Y ademas e docter a puntre si "el a bula den cura di hende".

El a bay SVB y tur bao di keintura y ta tende: "Bin diaranzon", di manera cu e tin su sigui traha cu keintura y tur malo cu e ta.

Ta asina nos tin cu depende riba proteccion ? Ta asina nos ta haya servicio policial y di recherche, y di SVB ?

Esaki ta e Aruba di "Free for all" cu nos ta bibando cune, y tin cu sigui tende MENTIRANAN di nos Servicio Policial masha atento, di nos Salubridad cu ta un di e mihoran den Caribe.

Si e hoben a muri, e ora ey si lo no tabata tin lugar pa pone e cantidad di polis, recherche, docter, SVB na lugar di e atake. "Nos ta biba caba tras di trali, y pronto, ni sali no por sali di cas mas tampoco".

E caso aki ta registra na polis ? Mirando e trato cu e señora y su yiu di crianza a haya, mi ta sigur cu no tin NADA riba papel di manera cu por bisa awe: "Nan no a duna keho o denuncia esaki NUNCA !"

CUIDAO CU TRES CERVEZ ORA BO TA STUUR

Pronto bo no por dal 3 cervex mas ora bo tin cu stuur, pasobra bo ta haya BOET pisa despues di test cerca polis.

Si ta para riba 3 cervex, ta MITAR DI ARUBA lo tin cu haya multa pasobra bebedornan di cervex ta gusta MAS y no menos di tres. Durante carnaval, ta bon pa bebe awa y lechi, of bay fiesta carnaval cu awa di lamoenchi, pasobra despues di paradanen, ta MITAR DI ARUBA lo tin cu paga multa.

Pero..... ta kende ta controla e grupo grandi di polisnan cu tambe ta gusta nan "biertje"? tanto durante trabao como despues di trabao ?

FANATICONAN DI " MIGHTY TALENT" FOEI.....!!

Mi a ricibi ayera un carta cu asina yama "Fansnan di Claudius", Linda, Jeanine, Solange, Ria, Evelin, Tineke, Olga, Rika, Fairy, Ghinee y Lissette a manda pa Lady K.

E carta ey ta di lo mas sushi cu por manda pa un hende y mi ta sigur cu Claudius Philips no sa di esaki y lo desapropa e actitud aki sigur. Lady K a gana e concurso... El a canta e cancion cu den carnaval ta pa disfruta di dje. Lady K. no a traha e cancion tampoco (ni riba su bida personal). Kevin James a traha e cancion y Lady K a haci cambian den cierto palabranan cu como ser femenino ta cay mihor pa e cancion, y el a cante.

E cancion mester ser mira como un cancion carnavalesco pa diverti cu e palabranan, no como instigacion ni como e palabranan baho cu a ser usa den e carta. Foei muchanan !!!

OTRO FOEI PA E INVITACION PA FIESTA

Otro foei cu mi mester comenta ta e aviso den corant ayera di La Fiesta. Esaki si ta un tipo di instigacion pa hobennan bishita e lugar pa haci bagamunderianan den dje. Si e lugar aki mester ser considera como lugar decente, nunca nan lo a pone un aviso asina den corant y cu palabra insinuando na manera fini cu den mey ora bo ta pega na curpa di homber (of vice versa) y ta sunchi etc. Tira un bista riba pagina 16 y lo bo haya sa na kico mi ta referi. (ta unda nos ministro pa hubentud y bon moral y decencia, a keda?)

Juby